

البحر بيطرد ميثه

أشعار بالعامية المصرية

إبراهيم حامد

دراسة

د. يسري العزب

فرع الشرقية الثقافي

سلسلة خيول أدبية

المستشار / عجي عبد المجيد محافظ الشرقية	الفنان / د . أحمد نوار رئيس الهيئة العامة لقصور الثقافة
الشاعر / مصطفى السعدني رئيس الإدارة المركزية لإقليم شرق الدلتا الثقافي	الفنان / محمد الشاعر مدير عام ثقافة الشرقية

هيئة التحرير :

إبراهيم عطية
أحمد سامي خاطر
أحمد عبده
بهي الدين عوض
سهير مكاوي فرج
محمد عبد الله الهادي

وكما تواعدنا دائما أيها المحبون نلتقي على حب الكامة
وسمو الحرف ، ورفعة المعنى ، فالأفق هو عالم الإبداع الأثير
انفتاحا وتطلعا لكل ما هو صدق وبهاء ، إنه الشاهد على علم
التطلع للضحى الكامن في أعماق أعيننا ونحن نتطلع لرؤية
نصيبها أو غاية ننشدها ، وبكل ما نملك من رغبات حرة ، لا
تحدوها المنافع والأهواء والمصالح الخاصة .. إنه الحلم الذي تنشده
الفنون ، ولاسيما فنون الإبداع الأدبي .. ذلك الأفق الذي نطالع فيه
(خيول أدبية) في طرحها الثاني ، وهي تركض نحو تأكيد
قدرتها على اللحاق بركب السيطرة والانتماء والتفوق ، وفي
موكب الحق والخير والجمال ، ذلك الثراء الفكري والثنا في
والإبداع الذي دعمه ، بل واستثمر فيه معالي الوزير المستشار
يحيى عبد المجيد محافظ الشرقية ، ليكتمل البهاء والاستمرار ،
وفاء بوعد النبلاء في احتضان أدباء وشعراء هذه المحافظة الثرية
والخصبة في شتى المجالات والفنون ، إنه حرث الفنان / أحمد نوار ،
الذي ولي وجهه شطر أصحاب الفكر بالقلم ، أو بالفرشاة سواء
ليؤكد أنه الزمن الذي يتحتم علينا فيه أن نؤكد - بما في الفنون
من لغة مؤثرة - على ضرورة النظرة بإنسانية إلى العالم ،
لنتمكن من الانتماء .. بل والتماهي فيه .. مدعوما بورود الشاعر
الأرق مصطفي السعدني الذي يضيف على المشهد الإبداعى بهذا
الإقليم الخصب جمالا مضافا ، باقتراحه المقترن بالرعاية ، وحرصه
الدائم على اكتمال البهاء .

والله الموفق

الفنان / محمد لشاعر
مدير عام ثقافة الشرقية

الإهداء

ابنتي خلود ..

حاولت أن أطرده ما بداخل قلبي

حتى تكوني وحدك فيه

فأقبليني ..

الأصدقاء ...

مأمون كامل - ليلى محمد علي - أحمد إسماعيل

عذرا ...

تراجعوا قليلا ..

إبراهيم

حاجات متفاته

بتشرب الدنيا
بتقفل عين وتفتح عين
ويترمي بكل همومها عليّ
تسيبني قصادي
زي الطفل التايه فيّ
بادور عني وعن أحلامي
وعن مخالق الدنيا التايهه
ساعتها بتطلع مني
سماح
الواقفة ورا الشباك
بتشد حبال الشمس وتحلم
بالطيران
بتلم خيوط الصبح بإيد
والإيد التايه بتبعد بكره
تخاف
من لحظة حزن تاخذني بعيد
وباخاف من كل الدنيا عليها
بتشوف العالم من جواها

حواديت " جوليت "
وباشوق العالم من براي
مأساة " هاملت "
بتخش همومي ويومي
ويتشبه في حاجات متفاته
وحاجات
وأنا باشبه فيها الطهر المالي عيونها
بالليل
تشاركني كتابي وترحل
ويا الحلم اللي معودنا ما يتحققش
والصبح بتشرق ويا الشمس
اللي محوطاتي ساعات
وساعات بتغيب عن كل همومي
ترجع تاني
تشبه في حاجات متفاته
وحاجات
يا سماح
الحلم اللي احنا بدرنا عشاته قلوبنا
بيطرح

لكن لسه ما خففنيش م الموت
فما تستحليش العزف علي الأوجاع
وتتزي بواقى الخوف جواي
باستني عيونك تبعك لي كل صباح
إشارات
فتاخذني لحد الحب النائم في
فيصحي
ويشوف العالم من جواي
ساعات
وكثير بياخذني بعيد عن نفسي
ويا الطفل التايه في
أدور عني وعن أحلامي
وعن مخاليق الدنيا التايهه
فتطلع مني معاني قديمه
تقول يا سماح
الحلم اللي احنا بدرنا عشاته قلوبنا
بيطرح ..
لكن

مستشفى الزقازيق العام
(قسم الجراحة)

[١]

اسم المريض : سماح
في ٣٠/٣/٢٠٠٠م

[٢]

سريرين
وحيطان مدهونه بلون
يشبهلي كتير
ووليه عجوزه

بتسرق مني الوقت
وبتخدش في حياي
وسماح
بتتطف قلبي
بتتبط لي النبض

صوره قديمه
لحد .. أكيد يشبه لي
أيوه .. دي صورتي
كأنت جوه جريده قديمه
لعبت فيها الدنيا شويه
فضاعت مني

[٣]

لحظة يا أستاذ
تذكرتك
مديت له ايدي

بآخر حبة لب ف جيبي
اتبسم
قال لي اتفضل
قلت هاشوفها
مشتاقه تضم عيوني عيونها
قال لي اتفضل
قلبي انتطط في

وطار لعينها
قال لي
انزل م العربية

[٤]

سألتني سماح :
راح تعمل إيه
لو بعد الشر
أنا مت ؟!..

وأنا خايف جداً
م الملايات البيضاء
ورعشة عينها وشكل الموت
: هاموت
فقال لي :
طب أعمل إيه
لو بعد الشر
بعد الشر
تموت ؟!..

ما ختارتش لحظة كوني أعيش
أو حتي .. أموت
لكني احترت ف فكرة موتها
وإن القلب أزاى من غيرها يعيش
قلت لها :
بعد الشر
بعد الشر

[٥]

الساعة سته تمام
والراجل واقف بيبخلق لي
يسقف تاني
فتطلع روعي
تفرش في البلكونه وتقع
وأنا وحدي ف وسط العالم
أعد سلام
دائماً واخداني لتحت
واستني ف بكره
ينام جواي ويصحي

ترجع لي ملامحي وروحي
واستتي الساعه سته تمام
الراجل يجي ويبخلق لي
ويسقف تاتي

[٦]

القطر الجاي ياخذنا
هياخذنا لفيني ...؟
هيسابق كل الزمن الفايث
قدام عيننا
ولا هيوصل بكره بسرعه
حزن امبارح
أوقات بنحس اتنا عايشين
علشان الدنيا لازمها حياه
وأوقات بنحس إن احنا حياه
ولازمنا نعيش
حاضنين الدنيا بشكل جديد
القطر الجاي بشكل جديد
هياخذنا لفين ...!

بواقی صورہ مکسرہ وشارع قدیم

كعبلني ألبوم الصور
كان مرمي جنب كتاب قديم
فوقعت فوق صورة حبيبتي
كات صوره
مطبوعه في عيوني
وابتسامه قديمه جداً
فوق خدود الشمس طارحه
والحياء
كات حلوه جداً
شلت كل سنين حياتي

بين أيدي
فضلت أقلب
بين شهور وسنين طويله
شفت صورتك
لما كنتي بترسمي لي

الدنيا فرحه
واما قولتي
كل شئ في الدنيا ملكك
شفت لما كنت باتحايـل علي كل الظروف
علشان عيوني تحضنك
أو إني أسمع ندهتك
كأت كل حته في تنطق
نفسـي اعيش
كأت ساعتهـا
إيدي ممدوده بسنين عمري
اللي فضلت تعشقك

فضلت، اقلب
شفت لما بنيتي دنيا وقلتـي :
عيش
قلت باحلم
كنت بأسأل نفسي دائماً
ليه ساعتهـا قلتـي عيش...!؟

لما ماتت في كل الممكنات
صوره غريبه لحد قول الاغتراب
فضلت في الشارع ألملم
صورتي من جنب الحيطان
ما كانش هو الشارع اللي عشقته فيكي
ولا كات دي صورتي اللي اترمت
جنب الحيطان
ولا كنتي إتني
بابتسامه قديمه جداً

وسط زفه
ما فضلش من ألبومي
غير صورته بتيمة
وسنين طويله ما عشتهاش
ما فضلش مني
غير بواقى مكسرة
من حلم مات .

لون ثاني

مين اللي قال إن القمر
مهما يغيب
هيعيب ضياه
أو حتي يوم راح يتنسي
أو ضحكته ترحل معاه
لساك في نيت القلب
بتشبعك صوابك للبراح
وتنام علي صدر الدفا
لحظة ما بيضيق البراح
وبتشتهي سكة رجوع
للروح جناح
بيشيل معاه
طعم الأمانى المدهشه

والليل نهار
مصلوب عليه شجر الخريف
فضفض معاي بالكلام
واطرح علي الورق الغريب
غربة حياه
وأرمي لي من بين السطور
غثوة (ولاء)
كام مره قلبك خاف عليها
وأنت بتسلم عليها
بتحضنك دمعَة عينيها
وهي بتقول لك سلام
فضفض معاي بالكلام
للموج شطوط بيروح لها
في وقت ما تشتد الرياح
والخوف من الخوف الغبي
ليشدنا من نفسنا
ونروح معاه
ابعت حنينك للسما
ينزل مطر

يغسل عيون المشتاقين
يا ابو اسماعين
كل الشوارع
والكراسي ف قهوة الزهراء
واحشها ضحكك
حتي المحلاوي وجلال
ووجيه وابو عليوه الحريص
بيدندنوا لحني الحزين
وأنت بتلون
عيون الشمس من تاني
وتغزل من خيوطها النور
وترسم ع البلاد ضحكة
بلون الأرض والنني
واحشني كثير
وواحشاتي الأمانتي ف بحرنا الميت
وصوت بكره اللي بيطل ف عيون الليل
ويوصلنا بأغاني الليل
ويسرقنا
ويضحك من حكاويننا

فيحكينا بلون تاني
ويمسح دمعنا الطالع
علي صدر المدن والليل
واحشني كتير
ومشتاقه العيون تحضن تلاقينا
ومين فينا
هتاخذ الدنيا من نفسه
ويشتهي سكة رجوع .

البحر بيطرد ميتته ...

وهاخاف من إيه ؟..
أو اخاف علي إيه ؟..
ما الدنيا ف سكة بكرة هتمشي
هتمشي
والطير الناوي بهاجر
هيمد خيوطه لآخر شوفي العريان
وسواء إن طلّت مداي
ما كهلنّيش
فاتا هاقدر اعيش
واتمدد فوق الصخر بعيد
يحكي لي النورس

عن حكايات بتموت
وحاجات بتعيش
عن عمري وعمره
وموج البحر

وسفر الناس
يسألني كثير
البحر يبطرد ميتة ليه ..؟
والموج الواخد سفر الناس
ليه مش بيعود ..؟
ويرجع ثاني الطير والناس
ويطلع مني الشمس النامية لحد الموت
ما بقاش صياده يهمه يعود
أو ليه ما يجيش
واتا كل محيطي براح البحر
وريحة الملح

وقلبي العايش في
يسلم بالحكايات
ولا جاش علي بالي
أسأل نفسي
ليه الميه ف بحر حياتنا
دائماً رايحه
وما بترجعش

مع إني يوماتي قصادي شافها
واخذه ملامحي وعمري معاها
لبعد الشوف
طب اخاف من إيه ؟..
أو اخاف علي إيه ؟..
ما دام القمر الجاي
هيعيش
هيعسل وشه ف وش الدنيا

يسلم ليئا آخر لحظه ف بكره الجاي
ويجيب لي النورس
يمكن يرجع ثاني معاها
الطير والموج
وياخدني النفس الطالع مني
لحد البحر
أتبسم ليه
لجل تخش معاها الشمس
قلوب الناس .

شخایط

الشمس بتتشاقي كثير
وكتير بتشخبط في الأيام
وساعات
بتجيب لي امبارح قدام
وبتاخذ بكره مكانه
وبترسم في شوارع قلبي الضيقه
أشكال
وبتاخذ مني خيالي
وتجري معاي وراه

وتخبي ف عبي
وهي مسافره .. الخوف
يستنظر قلبي عيدان القمح
وصفحة بحر موسى

والناس الماشيه علي الكورنيش
وتلامذه وحوش مدرسه
وقهاوي كثير
و(عرابي) .. الساعه اتنين
ويطعم الدفا توصلني عيونها
لحظة ما المح جوه وشوش الناس
شخابيط
وتبان من أول يومي علي الأسفلت
شقاوة طفل وطفلة
بيتحدوني ف لعب الحجله
وف آخر يومي
تخش جيوي
وتحكي حكاوي كثيره
عن العشاق
وعن الأحلام
وعن الأيام النايمة ف ورق الموت
عن ناس مرميه ف ركن بعيد
وناس يتعيش علي ناس
عن قمره بتسرق منها كل عيون الناس

ويتحزن جداً علي مشاعرها
التايهه ف هم الناس
لحد الصبح ما يفتح عينه
تنتطط فيه
ويتتشاقي كثير
وانا خايف امد ايدي ف جيبي
لتسرق مني صوابي
أو أطرف عينها
فتطلع يوم
وتغيب عن عيني
كثير .

خـلـود

—
٣٥
—

أي شئ في الدنيا
ممكن أقبله
إلا إني ما احيكش
يا ملاك قلبي الصغير
يا ربيع حلمي الكبير
قلبي حسك
زي إحساسك يا عمري
بالملايكه الطيبين
وقت ما بترسم إيديهم
ضحكه صافيه ع الخدود
بس خايف يا (خلود)
الصباح ما بقاش صباحنا
والنهار بقي لون جراحنا
والأمان بقي شئ خرافي
م الأساطير القديمه
وانتي في
ضامه قلبي مدقياتي

مكسره فيّ الهموم
بس خايف
يا ملاك قلبي الصغير
يا أمل عمري وحياتي
يا (خلود)
الزمن ده
مش زمن أحلام بريئه
صدقيني
دا أقل من الحقيقة
صعب جداً
إننا نعيش في الحصار
في الدمار
وف نهار ما لهوش ملاح
شوفي بغداد الأبيه
دمها بقي جرح فيّ
دمها علي قد حبي يا ضنائي
حب أكبر م الوجود
يا ملاك قلبي الصغير
يا أمل عمري وحياتي يا (خلود)

واضح إني
بعدت عن حبك شويه
غصب عني
يا أرق قصيده في
يا حبيبة عمري والدنيا اللي جابه
بكره ملكك
شكلي علي قد شوقك للحياه
شمسه صافيه بلون عنيكي الدفيانين
وايدري لي الحب فوق كفين صغار
شكليه سكة سقر
سافري لي فيها
أو يكون سكة رجوع قابليني فيها
أوهبك عمري وحناني
وافطمك علي ضحكتين مالبين عيونك
يبقوا مرساي وحنيني
وقت ما اشتاق للبراءة والربيع
يا ربيع قلبي الصغير
يا أمل عمري وحياتي
يا خلود .

أبجدية موت

[ل]

ليه الشتا دايماً حزين
بيحط دمعته ع البيوت
ويخبي حزنه من البشر
لحظة ميلاد الموت
يا قلبي يا مسكين كفي
جوه الموات
كان الدفا
كن الحنين مالي الشوارع والبيوت
و ف (ليلي) واحده انتهى
ما تقولش فين ..
ليه الشتا دايماً حزين

[ي]

ياسر كلمة كن فكنت
لبيت نداك متشوقه
بالفرحه والتوب الجديد
زي العروسه مزوقه

صدقني اللي جواي انكشاف
رفرف ملاك الموت كشف
عن أول السكه البراح
خلاي أروح متشوقه
خبي يا (يسري) دمعك
روح اللي عشقت سكتك
حوالك بتهديك السلام

[ل]

لسه الحياه بتشدنا
بتزلنا
بتوه الحب القليل عننا
يا روح بتطرح في الوجود البسمله
سمي علي القلب الصغير م الوجع
عمرك علي كف السما منقوش وجع
جوانا حلم بينتظر لحظة رجوع
جوانا ملو الكون دموع

[ي]

بإلله بقي متشكرين

كل اللي باقي مننا

حبة آلام

حبة دموع

حبة حنين

حبة ورق مكتوب عليهم حلمنا

أو جرحنا

وجريت يا (يسري) بيّ فوق شط الحياه

شفتك بتتشاقي كثير

جوه المدن

بالكلمه وبصوت الضمير

واخذ ميلاد البحر

وخيال المقاته

نخلتينك في العلاي

وشجرة مريم الواقفه علي صدرك

بتطرح ريحة النعناع

تطيبيني وأنا مسافره

بعيد عنك .

وحدہ

۴۳

تفرق كثير يا موت
أنتك تجي لي
أو أنا
أخطف عيونك م السما
واخذك واظير
شايلك في صدري قنبله
شايلك ضنا
شايلك ضمير

يا موت واخذني لفين ..
وفين هتخطني ؟..
من صغري ما أعرف خوف
ولا بيهزني
دوامه شاداتي لتحت
ونفسي أظير

باتمني أكونك
وأنت بتبدر
فوق الوطن الطاهر دمك
لكني بفكر
لحظة ما الرصاصات العميه
تشوفك
ترسم ع الجدران من دمك
لحن الموت

اتراجع مني وأشوفك وأنت هناك
بتبص عليّ وبتتأسف
إنك كنت الطاهر وحدك

تعرف
باستشهد
بيك وأنا قاعد ع القهوة مع أصحابي
وأنت بتستشهد

لكن بيني وبينك
فرق كبير
فرق ما بين العايش ميت
والميت حي

تعرف أنا أول ما تعلمت اتكلم
مش قلت : يا أمي
زي بقيت الناس
لأ ..
أنا قلت : الله
وما دام بالفطره عرفت الله
قبل العقل
فيقول دلوقتي بعقلي
الله
يرحمنا جميعاً
يا فلسطين .

إيه الحياه..؟

إيه الحياه ؟..
هي الحياه إتك تعيش
وقت الموات
هي الحياه إتك تعيش
وقت انفلات البرج م الحمامات
وقت انحراف الكلمه م المعني
والبنديقيه م الرصاص اللي اتخفق جواك
إيه الحياه ؟..

رغم اندهاش الطير من المشهد
كنت واقف في الميدان
بتنقش بالقلم فوق القمر
غصنين زيتون
وحمامه بيضه ف وسطهم
فاتح في صدرك
بوابات للناس
واصل ما بين كل الجهات

فاتك إن القلب أوقات العواطف

ممکن يخدعك

كان سهل تعرف وقتها

إن البراح وموج البحر

ووشوش الغلايه الشقياتين

أشكال قديمه للحياه

كان سهل تعرف

إيه اللي خدهم من ملامحك

وأنت مطبوع ع الوشوش ؟..

إيه اللي خلاهم هدم متعلقه في بحر الحياه ؟..

بيشدوا آخر نقطه م البحر اللي رايح للميدان

وينسوا يكملوا الرسمه

ويتوه ما بين الضحكه والدمعه

أطفال كتيره بيندهوك

جمد صوايعك ع الألم

وأرسم هناك

مليون ملاك

ساعة الآدان راح يعشقوك

كان وقتها طالع (محمد جوده)

بين بين الشبوط

يقول: مهلوه

له اللي الرسيم غلي كل وش وكل بيت

مغوف سنينها ازان الله

مسيحت بر عشمك اظلمك القطر فح

غلي ارض الليلان

كان غسي اكتب كل سنة الاخر ارمعك

اكن بو غلي الدم خنصت دم القلوب

صفتي كان لا اوم موت

وموتت صموا بعك عم القلم

وقفت خروط الرسيم فوق الشقة

وتند ليك من هلك

توصل هنا

والتو وتنتو والمليون مملك

واقفين حداد عم المشقة

والرسيم طالعها السما

والرسيم طالعها للحياة

الموت أوقات كثير بيموت

رافض تموت جواي
أرفض
بس سيني أبكيك
وأعلن علي الدنيا اللي سرقت
قلبك الأبيض
ودارت عنك الحمامات
ببتك حي
ومالك زي في الدنيا

يا دره فوق جبين قلبي
يا كل الضي
تعالى ولملم الطلقات
من الشهدا ومن جسمك
وفرقتها علي أصحابك

لحين ما تعود
ووضيهم
وليسهم معاك كفنك
ووريهم مكان القبر
عشان يبقى الوطن باين في وش الكل
مادام الموت بقي أعمي
ما بيشفقش الكبار فينا
وسيبينك في وسط النار
بإيد أصغر من الطوبه
وحلم أكبر من الدنيا
يا طائر فوق جراح وطنك

ومتغمي
ماتستغريش م العتمه
وما تفسرش يقع الدم في هدومك
يا طائر فوق جراح وطنك ومتغمي
دا مين غماك ؟..
ومين فينا هيفتكرك ؟..

ومين ينساك ؟..
تعالى وحط فوق " حطين "
وغنى لها
يا قدس ومين يحررها ؟..
خواتك مين هيسترها ؟..
ومين هيرجع الحمامات ؟..
ويوم العيد
ومين يرفض بموت زيك
ويبقى حي .

لحظة عطش

—
٥٥
—

إيه اللي اتغير جواي ؟..
خلاتي أفكر مليون مره
قبل ما أخطي
عراتي من خلقاتي العطشاته
لألوانها الباهته
ورماتي في حضن الخوف
إيه اللي اتغير ؟..
خلاتي مش عارف نفسي
أنا أنهو ف كل التايهين !..
أنا واحد
ولا كتير لملمهم جسمي وسكنوني
وبقيت براي
إيه اللي اتغير جواي ؟..
فتفتني حاجات وحاجات
بتخاف من بعضيها
وسقتني كتير
لحد ما عطشت كل حواسي

لطعم الموت
خد صدري بعيد
خباه في الوجع النائم في
إيه اللي سافر في ..؟
لسه مش رجع ..
إيه ...!؟

مغلوب علي أمري
ولا انتفاضة دمي
لسه معشمتاني بالرجوع
مسلوبه مني الأسئله
ولا الكلام في الحلق مستسلم
وراضي بالسكوت
أنا ضهري مادد حيله
ولا المنحني شكلي
إيه ..؟
التفسيرات الممكنه
حولها شكلي للجنون
والحلم مكسور الجناح
بايت في عشه في الخلا

رعشة إيديه
بتخدني للشمس اللي غابت من زمن
خلتني أتمني يموت
يا يموت يا أموت
الحاله واحده
والمعايشه كلها شكلي
لحظة جنون الأسئله
الشمس بتغيم
لكن ما بتمطرش
والحلم ما بيخرجش من كفن الغروب
وبحاول انزع مني خوفي
ألقي انتفاضة دمي
لسه معشمتاني بالرجوع
فأتوه مع اليوم المسافر للحنين
وتخدني نفسي للبراح
اشتهدني سكة رجوع ..

تماثيل

—
٥٩
—

تمائيل
بتخش وتطلع مني كتير
وساعات
بتاخذني علي الفتارين
فبشوفني هناك
ماتيكان
بيقرب بيني وبين الناس
الواقفه علي الفاترين
وبيشبه في حاجات مرميه
حاجات منسيه
بيشبه كل الناس
ويرتل خوفي ساعات
وبيخرج مني
لأجل يقول للناس مواويل
آه يا ليل
يا واخذنا لفوق
لحد طلوع الحلم الجاي
ولحد طلوع الروح

آه يا ليل
ودخلت في روحي
بقيت تشبه لي
وتشبه كل الناس
وفردت جناحك
عدي براح القلب ونمت
ليالي كثيره نقول
تماثيل
وحواري كثيره لخلق الروح
مجروح
وسايبني أموت
لحد سواد الليل ما يروح
متلخبط في
وأنا كل حروفي
بتشبه كل الخوف
وبتشبه في
حاجات مرميه
حاجات منسيه
بتشبه كل الناس .

وش الصبام

وشك كما وش الصباح
زي اليمامة بتتكسف مني
فايت في قلبي
اتساعك للحياه
وبتمتحن في العروض
لساك كما كنا زمان
فالكر زمان
" كان لنا بيت
عنوانه بين باقي البيوت
شمس في سما
شارع ملان بالهممه
في مدينه واسعه
إنما "
كان قلبك أوسع من حيطان الدنيا
من كل البراح
يا ضحكه رنه في الفضا
صوتها كما صوت الآدان

شأيل في قلبك
أمنياتك للوطن
ولا مره كنت كلمتك جوه الضمير
آه يا ملاك الحلم في الوقت الغبي
خايف من الموجه اللي جايه
تخذنا منا
" وقالوا زمان
ومن آدم لحد الآن
ولسه يا ما حيقولوا "
غناوي كتير عن العشاق
وعن قلبي اللي بات عطشان
وعن حلمك
وعن حلمي
وعن خوف اللي بيخافوا
ولاخفتش
ولا صدقت يوم الضلمه راح تطول
ولسه ف قلبي بتسافر غناوينا
ويحلو الكلام بينا
ويحلو السهر وياك

علي الأوراق
علي " الزهراء "
ما بيهمش
ونرمي بكل أوجعنا
بعيد عنا
وتضحك منا
ترميننا بهموم ثانيه
يا واخذ مني أوجاعي
وواخذ منك الطيبه
وبيقولوا خلاص صورتك
بقت تايهه عن أولادك
كان الكلمه
ما نبتت حروف إنسان
كان المعني ما وصلشي
ونسيوا بابتك المصري
ودا شعرك
وأيام الزمان عمرك
وفاكرينا في يوم هنتوه .

للموت سكك.. ما بنمشيهاش

حاول وأنت بتلمس روحي
تخش في روحي
ترسم خط العمر قصادي
وتفسر لي الكلمة الباقية في حلق البوح
خش الروح
تلقي جروحي ساكنه قصادي
في ركن الأوضه
بتكمل لي ملامح صورتك
راديوا قديم
ومحطه وحيد
فوق الحيطه طاقيه حزينه
والجلايه البني بتحضن
شالك الابيض
تحت الكنبه
الجزمه الدايبه في عرق الأرض
وأنت بكل ملامحي بترسم
عمري وعمرك

قلبي يكلني وأنت مغير كل مسارك
لحظة ما يشكلنا الخوف
فانتوه من بعض
ولأفبك في السكه اللي ما تسمحش
تخدني معاك
أندك لك
وأنت تشاور ليه
وبتدني ميعاد مفتوح
معرفش ساعتها
ليه وأنت بعيد
حسيت بالغريه
وايه اللي باقي لي...؟
توبك الابيض
قلبك الابيض
الأحلام اللي مكبرها في قلبي وقلبك
شارع كنا بنضحك تبكي
نلعب فيه
رانبوا قديم
وطاقيه حزينه

كنبه تزيق
لما بتيجي تزورنا الناس
صوره قديمه في نص العمر
كنت شايها من الكرنيه
دمعة أمي
لما بتصحي وعينها بتيجي
علي جلايتك
أو أتأخر عنها شويه
أو تندد لي مره بأسمك
فتحزن صورتك
وتببلها بدمع العين
لحظة ما يشكلنا الخوف
ونتوه من بعض
فنلقي سر الكلمه الباقيه
في حلق البوح
خاشه الروح
راسمه لطيفك شكل جديد
ولأحلامنا
سكه بعيدة ما نحلمهاش .

بحر الحياه

بحر الحياة جواه مطر جواه سفر
وبيوت وشارع فيه قمر وفيه بشر
وهموم بتجرى تلف بينا تضمنا
وزمان بيكذب زى شوقنا لبعضنا
وأيام تفوت .. وأمان يموت
ونتوه ما نلقى نفسنا
ف بحر الحياه

شارع قديم كان فيه بشر نشبه لهم
عشقوا الحياه قسموا معانا ضحكهم
دالوقت ليه الضحكة ماتت وسطهم
وادينا بنعيد اللي فات
وادينا بنموت من سكات
بحر الحياه من غير بشر

أطفال كثيره بتجرى تحلم بالحياه
وناس كثيره ديكث معنى الحياه
بحلم يا دنيا بالبراءه والصفاء
وولاد بتلعب جوه أحضان الدفا
بحلم بعالم فيه حياه
غير الحياه
وادينا بنعيد اللي فات
وادينا بنموت من سكات
بحر الحياه من غير بشر .

آخر غنا للبحر

٧٥

اعزف علي الأمواج
غثوة بنات الحور
وافتح ببيان النور
واحضنا لما ننام
حضنك دفا وبراح
مين اللي قال رواح ؟..
وانت اللي حاضن غناك
من أول السكه
ولحد شوف النبي
والسدره والمنتهي

والروح تعود للحياه
وببتدي عمرها
شطك براح في اللقا

واكثر كثير في الوداع
لسه الحنين ع الشطوط
جوه الصندف خباه
حتي الحياه في البيوت
متعوده ع السكوت
دايه في ترتيلك
وأنا عمري يشبه لك
يشبه كثير للصفاء
للموج وللسموات
غني لي غنوة دفا
وأرميني بالأزهار
خبيني في الأسرار

لسه البكا في الروح
متحجره عيونه
خايف عليك يابحر
لحظة فراق الموج
يستظرك ع الشطوط
ويخاف ما يرجعشي

ونتوه معاه ع الشط
شوق الغلابه قليل
والحلم متخبي
يا قلبي ما تخبي
حزن الغلابه كتير
طالعين لوش الصباح
متكفين بالشمس
متونسين بالنور
ويا بنات الحور

مشتاقه أروحنا
عزف القنا للمضي
يا بحر وأنت جاي
أعزف ع الأمواج
غثوة مطر للروح
باب السما مفتوح
طالعين علي الجنه ...

قراءة في ديوان " البحر بيطرد ميتة "

للدكتور / يسري العزب

(١)

من الشرقية الخضراء .. عاصمة الكرم المصري .. أرض
الشهدات والأبطال .. البطن الولود القوية التي اثبتت منها
فارس الزعماء ورائدهم " أحمد عرابي " معلنا تحرير الروح
المصرية والجسد الأوزوري " الحديث " من كل قيد يعوق
حريته ويكيل عزته ويقهر كرامته .

من هذه الأرض يخرج المبدعون في كل مجالات الحياة في
بلادنا ، مجددين بالفن حدائق الإبداع .

منها كان _ ويبقى في قلوبنا _ رائد الشعر الحر في بلادنا
" صلاح عبد الصبور " ورائد الأغنية الجديدة في أرضنا
" مرسى جميل عزيز " ورائد الدراسات الأدبية الذي توج
رأس الجميلة " الشرقية المرحوم الدكتور أحمد هيكل .

وتبقى محافظة الشرقية _ قبل هذا العقد الثلاثي الجميل
وبعده _ مصدرا للآلئ التي تضئ أوسع مساحة من ظلام

الوطن بإبداعها الفني الجميل ومن بينهم شاعرنا الشاب " إبراهيم حامد " وعد العامية الصرية المتحققة في كل ما يقدم من قصائد متميزة ، تألفت في الأمسيات والندوات والمحافل الأدبية التي استمتعت بهمسه الشعري القوي منذ أكثر من عشر سنوات ، التي جمع بعضها ديوانه الأول " مضطر أعيش " وديوانه الثاني "هل ممكن أخرج مني ؟.."

(٢)

يمنحك الشعر الجميل الذي تسمعه أو تقرأه من " إبراهيم " متعة التدفق الجمالي ، فتراك جميلا ، كأنك بعض مفرداته اللغوية الطائفة في سماء الوطن ، بقوة ورقة في لحظة واحدة ، يدفع بك إلي الأعالي طيار شاب ورث الخبرة والمهارة بالفطرة ، تراه طائراً معك أو بك في آفاق رحبة ، تتمنى أن تظل بها دائماً ، إنه شاعر بالفعل _ لا بالقوة _ يلضم حبات عقوده من مفردات الحياة اليومية البسيطة ، لا يتوعد في اختيار كلماته ولا يتكلف وهو ينظمها في جديلتها الشعرية ، فتبدو - كما نرى في غيرها من بعض قصائد الشعراء الآخرين - مغيبة للدلالة أو معتمدة للرؤية ، من البساطة ينبع تيار شعري متدفق ، يحملك

بيسر إلي رحاب من الفكر العميق ، فتجدك طائراً رقيقاً ،
تدور فوق حدائف من الصور والمعاني ، ذات ألوان
وعطور وأنغام وملامس متعددة .. هكذا .

(٣)

علي شاطئ (البحر يبطرد ميته) نجد العنوان بسيطاً ودالاً
على عمق فكري مذهش .. وبدءاً فالبهر هنا بالتأكيد ليس
(المتوسط) الشمالي ولا (الأحمر) الشرقي .. الذين تقع
في حضنهما بلادنا ، وإنما هو النهر الصغير الذي يتسلل
عبر شرايين مدينة (الزقازيق) التي تحتضن الشاعر وكل
المبدعين بحنانها ومحبتها وحنوها وأمومتها .. إنه (بحر
مويس) أحد بقايا الأسطورة المصرية القديمة .. هذا البحر
النهر وطن الشاعر ١ ي يعلن في قصائده انتماءه الحميم له
.. والذي - بالرغم من العواطف التي يحملها الشاعر له -
يطرد (ماءه) خارجه ، وكأنه يلفظ محبيه فلا يمنحهم
مقابل حبهم له حباً متكافئاً ولا يقف التأويل عند هذا الحد بل
يمتد إلي ما أبعد مدي في عمقه الدلالي .. فالبهر الذي
يحبه الشاعر لا يحتضن - حتي - جثث أمواته (ميته في
العنوان مفرد) بل يلفظها - أيضاً - إلي خارجه كيف لهذا

الرمز المتحقق أن يفعل بنا كل ما يفعل ونظل نحن -
الأحياء الموتى أو الموتى الأحياء - قابضين على حبه
رافعين راية انتماننا له ؟؟ لأنه .. وطن حقيقي لا نملك
إزاءه إلا الحب حتي الفناء .

(٤)

"بتشرب الدنيا ..
بتقفل عين وبتفتح عين ..
ويترمي بكل همومها علي
تسبيني قصادي زيّ الطفل التايه في
بادور عني وعن أحلامي
وعن مخاليق الدنيا التايهة ..
ساعتها بتطلع مني سماح الواقفة ورا السبائك بتشد حبسال
الشمس وتحلم بالطيرن ..
بتلم خيوط الصبح
بتلم خيوط الصبح بإيد
والإيد التانيه بتبعد بكره
تخاف من لحظة حزن تاخذني بعيد "

هذ المقطع من قصيدة (حاجات متفاته) يجيب فالمستقبل
الذي تجسمه الطفولة البرينة المتمثلة في (سماح) يعد
بالكثير مما يعيد للبحر إنسانيته بل إنه يمنح هذه الإنسانية
ميكراً للبحر .. فـ (سماح) بتشد حبال الشمس وتحلم
بالطيران) وأنا الشاعر / الحاضر المحيط تحرك بحركتها
فأبقي معها بعضاً من حلمها البرئ بالآتي الجميل :

(بنلم خيوط الصبح بإيد

والإيد .حانية بتبعد بكرة

تخاف من لحظة حزن

تاخذني بعيد)

وكما رأينا (سماح) عازلاً للانهيار .. فإتينا نري في

(خلود) القصيدة والطفلة (ابنة الشاعر) دافعاً لتحمل

الواقع والمعني إلي ا ستقبل في ثبات وقوة

(يا أمل عمري وحياتي

يا (خلود)

الزمن ده

مش زمن أحلام بريئه

صدقيني

دا أقل من الحقيقة

صعب جداً
إننا نعيش في الحصار
في الدمار
وف نهاري ما لهوش ملامح
شوفي بغداد الأبييه
دمها بقي جرح في
دمها علي قد حبي يا ضناني
حب أكبر م الوجود)

وهذا الحب (المتحد للحياة) هو الذي يمنح الشاعر طاقة
متجددة من الأمل " بكرة ملكك " .. شكلي علي قد شوقك
للحياة شمس صافيه بلون عينيكي الدفياتين وابدري لي
الحب فوق كفين صغار .. شكليه سكة سفر ، سافري لي
فيها ، أو يكون سكة رجوع قابليني فيها ..

أوهيك عمري وحناني
وافطمك علي ضحكيتين ماليتين عيونك
يبقوا مرساي وحنيني
وقت ما اشتاق للبراءة والربيع)

وإذا كانت الحياة في قصائد الديوان نغمة أساس تتردد في
 صوره فإنها تصنع مع نغمتها / الموت ، الإيقاع الفكر
 القوي التي تنتظم به قصائد الديوان (البحر يطرد ميتة ..
 مستشفى الزقازيق العام .. أبجدية موت .. إيه الحياة ..
 الموت أوقات كثير يموت .. للموت سكك ما بنمشهاش)
 وفي (أبجدية موت) على سبيل المثال نجد فكرة البعث
 المصرية ، تشكل الصورة الكلية للقصيدة ، بدءاً من مقطعها
 الأول (ل) ليه الشتا دايماً حزين / بيحط دمعته ع البيوت/
 ويخبي حزنه من البشر/ لحظة ميلاد الموت ()
 بينما في (إيه الحياة) نجد (الحياة إنك تعيش وقت
 الموات ، وفي (الكوت أوقات كثير يموت) يقول لـ
 " محمد الدره " طفل العرب أول شهداء الانتفاضة في
 فلسطين (ومين يرفض يموت زيك زيبيقي حي) .
 أنها دورة الحياة فصولها الأربعة ، حيث يبدأ من فصلها
 الأخير دائماً أول الفصول .
 تحية إلي " إبراهيم حامد " وأمل في مزيد من التفوق ،
 مزيد من الحياة .

المؤلف في سطور

إبراهيم حامد

عضو نادي الأدب بالقازيق

شارك في العديد من المؤتمرات الأدبية ، والمهرجانات
والأمسيات الشعرية علي مستوى الجمهورية .
نشرت أعماله بالجرائد والمجلات الأدبية المختلفة .

صدر له :

١- مضطر أعيش - ديوان شعر بالعامية المصرية -

سلسلة إبداعات - الهيئة العامة لقصور الثقافة .

٢- هل ممكن أخرج مني ؟.. - ديوان شعر بالعامية

المصرية - نادي الأدب بقصر ثقافي بالقازيق .

تحت الطبع :

١- خلود الأغنية والحياه - ديوان شعر بالعامية المصرية

٢- الريح - مسرحية شعرية بالعامية .

الفهرس

ص	العنوان	م
٥	الإهداء	١
٧	حاجات متفاته	٢
١١	مستشفى الرقازيق العام	٣
١٧	بواقى صورہ مكسرة وشارع قديم	٤
٢١	لون تاتي	٥
٢٧	البحر بيطرد ميتہ	٦
٣١	شخايبط	٧
٣٥	خلود	٨
٣٩	أجدية موت	٩
٤٣	وحدك	١٠
٤٧	إيه الحياه	١١
٥١	الموت أوقات كتيلا ييموت	١٢
٥٥	لحظة عطش	١٣
٥٩	تماثيل	١٤
٦٣	وش الصباح	١٥
٦٧	للموت سكك ما بنمشيهاش	١٦
٧١	بحر الحياه	١٧
٧٥	آخر غنا للبحر	١٨
٧٩	قراءة في الديوان للدكتور / يسري العزب	١٩

رقم الإيداع بدار الكتب
٢٠٠٧ / ١٠٤٧٨

التقييم الدولي I.S.B.N
977-374-303-1

دار الإسلام للطباعة والنشر
٠٥٠ / ٢٢٦٦٢٢٠
٠١٢٢٦١٤٣٦٢